

# Vun driveriver

erscheint auf [www.lenauheim.de](http://www.lenauheim.de)

monatliche  
Erscheinung

April 2017

von Helen Alba

## Jo nit krank sin!

Mir winscht sich so oft die Gsundheit. Bei jedem Geburts- oder Namestach, zu Neijohr un zu villi anre Gelegenheite. Sogar die Kinner wisse, dass se „Gsundheit“ saan misse, wann se jemande niese heere. Ob des villi Winsche was helfft, ich weess es nit. Weil krank ware mer schun alli, obzwar mer des nit wille. Un de erschte Wech, wann mer mit eener Krankheit zu tun hat, des is de Wech zum Dokter.

De Wech han ach ich unlängscht ingschlaa. Weil mer jo zivilisiert sin, han ich vorher beim Hausarzt angeruft, for mich programmiere. Ich hans stark in de Fieß ghat. Also sin ich beizeite vun derhem fort un war zehn Minute vor meim Termin in der Praxis. Ich han gewisst, dass mer e neiji Dokterin han, weil unser alter Hausarzt in Pension gang is. Im Wartezimmer han fünf Leit ghuckt, sie han mer gsaat, die Dokterin sei noch gar nit do, weil se e Dringlichkeitsfall hat. Also hat die Warterei anfang. Erschter uf die Dokterin un wie die dann endlich do war, uf mei Reih. Weil die Programmierung hat sich natierlich verschob.

Noh zwaa Stund war ich dann endlich im Unersuchungszimmer un han mei Weh geklaat. Ohne mich weiter zu unersuche, han ich e Rezept in die Hand gedrickt kriet un war ach schun wieder drauss. Also, ich han nor staune kenne un sin in die Apethek.

Die Apethekerin hat des Rezept hin un her gedreht, is dermit in die hinnere Reimlichkeite verschwunn. Un wie se wieder erschien is, hat se gement: „Bäsl, ihr misst zruck zu eirem Dokter. Do stimmt was nit. Die verschrieweni Dosis Medikamente is zu groß un es kennt was vorkumme“!

For zuruck gehn wars an sellem Tach schun zu spot. Mei Fieß han ach nimi wille. Also sin ich am anre Tach wieder zur Hausärztin. Ohne Programmierung. Ich han jo nor e anres Rezept han wille. Doch nix derweil. Ich sin for de Tach druf programmiert gin. Un was ment der? Wieder hat die Dokterin weger eem dringende Fall verspät un ich han warte misse. Un wie ich er gsaat han, dass die Apethekerin mich zruck gschickt hat, war die Dokterin ziemlich sauer. Sie hat mer awer doch e anres Rezept ausgestellt un gement: „Dermit werd jo eier Apethekerin zufriede sin“!

Doch die Pille han ich umesunscht geschlickt, ich sin dervun nit uf die Fieß kumm. Zwaa Monat lang sin ich vun eem Dokter zum anre: Orthopäd, Chirurg, Radiolog, Rheumatolog. Letscherer hat dann kunschtatiert, dass alles mit Rheuma zu tun hat. Dass ich erschter e zehn Täch langi Behandlung in eem Kabinett for Fiziotherapie mache soll. Un drei Monat druf in e Kurbad sellt. Ich han natierlich wisse wille, welles Kurbad dann am beschte for mei Fieß wär. Do hat de Dokter dann gement: „Ihr misst uf Kalatschi“! Die Kur steht mer noch bevor un ich wer eich noher schreiwe, wies mer in dem sogenennte „Schwowebad“ ergang is.